



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail: tiryimiyim@gmail.com

TAPAK 7

Yangia anidakangma :



Tir Yimiyim



tir_yimiyim



tir yimiyim

TAPAK 8

China aser North Korea na tsüingda passenger train senzü tenzüikshitsü

USA nung World Cup asayatsü Iran nokdanga mali: Trump



VOL. XXIII ISSUE NO. 148 (ADOK 148) DIMAPUR YANGTEPNÜ (THURSDAY) METSÜREMI (MARCH) 12, 2026 ₹ 5.00

ANCSU-i Vande Mataram magizüker

Dimapur, March 11, 2026 (TYO): Ministry of Home Affairs-i Nagaland nung shisaliok rejutem nung Vande Mataram azüngtsü tuyuba atema tebilemtsü abener aser iba tetuyuba magizüker ta All Nagaland College Students' Union (ANCSU)-i metetdaksüogo.

Nagaland ya temeyoktep kintem aliba state ka lir aser sobaliba, putiotsü aser tamangba yimsü maitsü balaka lir. Anungji college tem nung tashiyim agi Vande Mataram züingdaksüba ajanga Arrla 371(A) ajembanger

aser Constitution of India nung lateta aliba mezüingmeshir ta ANCSU-i ashi.

Shisaliok rejutem ya tangazükdak, kati ka akhümtsübudak aser ajak adenba tesem ka asütsüla. Ibala policy aser tetuyubatem ya Nagaland den meputep aser asen shisaliok rejutem nung tensa raksatsü akok ta parnokisa ashi.

Nagaland nung college aser shisaliok rejutemi Vande Mataram azüngtsü tetuyuba sülen manidaksü mepishir ta ANCSU-isa metetdaksüogo.

NEC-i Nagaland nem sen agütsüogo

Dimapur, March 11, 2026 (TYO): North Eastern Council (NEC)-i February 2026 nung Northeast state tem terenlok mapa inyaksü asoshi Rs 67,41,09,587 agütsüogo aser iba nung Nagaland nunga mapatong kar densema lir.

NEC-i sen agütsüba nung Phek, Kiphire aser Noklak district tem nung capacity-building programmes agitsü dena lir. Item sentong ajanga skills tajungba akümtsü, local rejutem tashi aitsü aser state nung community development yaritsü imlar.

NEC-isa Naga Chilli ajungkettsü atema sentong balala yarir aser iba ya agricultural value chains tashi aitsü aser market opportunities tajungba kümdaktsütsü nükjiding nung lir.

NEC-isa Nagaland nung Chungliyimti nung Museum-

cum-Library aser Guest House ka yanglutsü atema teyari agütsür. Iba ajanga sobaliba aser putiotsü senmang ajungkettsü aser tourism o research activities yaritsü.

NEC-isa state balala nem senotsü lezmüksüba dak alia North Eastern Region nung rejutem aser tanga implementing agencies nem Rs 30,07,14,985 agütsüogo.

NEC-i IIT-Guwahati, IIM-Shillong, Northeast Space Application Centre (NESAC), North East Handicraft and Handloom Development Corporation (NEHHDC), North East Region Community Resource Management Society (NERCORMS) aser tanga regional universities aser specialized organizations nem senotsü agütsüogo.

Nagaland Pentecostal Mission-i Vande Mataram ashishir

Dimapur, March 11, 2026 (TYO): Nagaland Joint Christian Forum (NJCF) aser tanga Khristan teloktemi National Anthem jakdang Vande Mataram atenba magizüker ta lemteba pusema nungiter ta Nagaland Pentecostal Mission (NPM)-i metetdaksüogo.

Nagaland nung Khristantemi National Anthem, National Flag aser India teti akhümtsübu arur saka Vande Mataram tendaktsüba ajanga tamangertem aikati tebilemtsü abener. Iba ken ya putiotsü aser sobaliba tangatetba nung Laishiba anema lir ta Khristan aikati bilemer. Khristantemi Laishiba nung Tsüngrem dang tushitsü aser akhümtsübuttsü ta asüba tesayuba sülen anidaker aser iba ama ken atenba nung shilem agiba ya tamangba yimsü aser mulungsentsü agi magizüker ta NPM-i sangdong ka nung ashi.

Iba ya linük memeimba ama aibelena mangatetsüla kechiyong

Nagaland nung Khristantemi ozing sülen anidaker aser Constitution of India akhümtsübur aser linük longjemba aser renlokba nung shilem tajung agir ta parnokisa ashi.

Constitution of India kübok tamangba yimsü aser mulungsentsü nüjiso agüja aliba akhümtsübuttsüla. Tamangba yimsü kar den meputep inyakyim kar tashiyim agi benoktsü merangbaji India nung democratic aser secular framework tangatetba anema lir ta NPM-isa metetdaksüogo.

Sorkar aser bangdak ketdangpurtemi Vande Mataram atentsüba ya compulsory masütsü atema angateta aser shisateta inyaksü mepishir. Loktiliba nung nisung ajaki kati ka akhümtsübuttsüla aser tamangba yimsü temeten alitsü aser yimjung nung liyonga aotsü ayongzüker ta Nagaland Pentecostal Mission, Kohima-i sangdong ka nung ashi.

NFHRCC-i CM Dr. Neiphiu Rio o meyiptsür SASCI kübok two lane den four lane memeyokteptsüla

Dimapur, March 11, 2026 (TYO): Chief Minister Neiphiu Rio-i Mongulbarnü Nagaland Legislative Assembly nung "asenoki anüing nung lenmangtem meyanglutetsü" ta ashiba atema NFHRCC-i olen kar meyiptsüogo.

Iba onük atema tongti tamendakdakji December 2024 nung SASCI kübok telok balala nem work orders 17 agütsüba lir. PWD (R&B) den contract agreement nung sign sütepa sülen work orders agütsü aser parnok rongnungi M/S JK Construction aser M/S Chabou & Co nem February 4, 2026 nü Show Cause Notice agütsüba lir ta NFHRCC-i ashi.

February 7, 2026 nü Minister Kaito Aye-i contractor anati mapa inyakdak semdang aser Show Cause Notice ji tongtepratep shitak masüba agi agütsüba liasü ta pai ashi aser March 31, 2026 tashi mapa inyaksü atsülangtsü. Kasa mapang JK Construction aser Chabou & Co. ajanga Baghty Division nung mapa

meshitak inyakba osang angazük. Anungji iba ama tensa ka nung bangdak Minister-i ola madoker aser M/S JK Construction o M/S Chabou & Co nem contract lezmüksüba MLA ola mali ta parnokisa ashi.

Iba ama tensa ka nung Chief Minister-i bangdak department dang mapang atsülangba aser mapa shitak meinyakba atema asüingdangtsüla. Külén Minister Kaito Aye-i iba mapatong meinyaktetba nungbo pai menden toktsütsü ta yimjak nung shiogo anungji pai Naga public tsüingdang ola adoktsüla. Paisa 2027 tashi nung SASCI kübok FHR renemtsü ta nangzükogo ta NFHRCC-i ashi.

Bangdak Minister-i nangzükba ama SASCI kübok second phase work orders agüjang ta Naga public-i ayongzüker. Khelma nungi Tizit tashi kilometer 395.9 shi ka atema ali kiburtemi two lane construction atema ali angati dang tenla agütsüogo aser iba temenok ya züingdangra sen

core meyrjang ishikabo asütsü ta NFHRCC-isa metetdaksü.

SASCI kübok two lane road yanglur aser mezüingbuba shilem tatemleni aruba agi nübortemi tanabuba shilem atema work orders agütsütsü mepishir. Ajisüaka sorkari SASCI kübok work orders agütsütsü melena four lane yanglutsü indang ang jembir. Ali kiburtemi two lane yanglutsü atema sen magitsü ta NOCs züluba 2018 nung Chief Minister Dr. Rio ket nung agüjadokogo. Anungji SASCI kübok second phase work orders agütsütsüba nung terata kecha mali anungji sorkari ali kiburtem dak tai metongloktsütsüla saka pelatsüla ta committee-isa metetdaksü.

Tang ashishitep ken o adokba ya MLA kari pusema nungiba Contractor Firms ajanga lir. Parnoki mapa shitak meinyakba ya 2013 nung State sorkar, bangdak Department aser committee tsüingda tenangzüktep agiba alema lir ta parnokisa ashi.

MP S. Supongmeren Jamir nem tenüngsang agütsür

Dimapur, March 11, 2026 (TYO): 18 buba Lok Sabha nung India-Chile Parliamentary Friendship Group nung Lok Sabha MP aser NPCC President S. Supongmeren Jamir züingsem asütsü shimba atema tenüngsang agütsür ta NPCC-i metetdaksüogo.

Lok Sabha Speaker-i parliamentary diplomacy tashi

aitsü aser India o Chile tsüingda tesentaktep akangshitsü atema Parliamentary Friendship Group nung S. Supongmeren shimok.

India-Chile Parliamentary Friendship Group ajanga linük ana tsüingda amalitep, tangatetep aser olemtep akangshitsü nükjiding lir.

Iba telok nung S. Supongmeren Jamir shimokba ajanga pa dak temulung alemba

aser tamang akaba sayur. Pai national aser international jenjangtem nung Nagaland nung alirtem atema ola adokba iba ajanga jungkai adoka sayur ta NPCC-isa metetdaksüogo.

Iba tongtipang parliamentary group nung pa züingsemba ya Nagaland aser North East nung alirtem asoshi konang ka lir ta NPCC-isa ashi.

Mokokchung ya Nagaland indang coffee capital ka kümdaktsütsü merangdi: Er. Philip

Mokokchung, March 11: Mokokchung nungi adokba coffee ya alima ajungai sabur aser market nung kanga demand lir, anungji, Mokokchung ya Nagaland nung "coffee capital" ka kümdaktsütsü merangdi, ta Mangmetong nung coffee lu ayimer aser ITI Mokokchung nung Principal, Er. T. Imlisunep Ao (ajaki pa dang Er. Philip ta ajar) den sensaksemdang pai metetdaksü.

Asen lima ya coffee lu ayimtsü asoshi ali aser tzü mopung kanga tesütep ta ibala asadanger mongintemi ashir. Tanga state-tem nunga coffee lu tulu ayimertem lir saka itemji joko tejen akümba den mozümora (artificial fertilizer) amshir

asünung terunem jena aor saka Mokokchung nungi adokba coffee yabo pa nung terunem (flavor) lia atanger aser taste-ji kanga junger, ta mongintemi ashiba ka, Er. Philip-i lemsatet.

Alima nung coffee taste tetendangba ka sa agir, iba nungji Mokokchung coffee ji 100% nung 80% dak tali score nguteta lir. Tetezü Mokokchung nungi adokba coffee-ji alimai junger ta züingokba rongnung densemer, ta pai ashi. India lima aser bendangli tesem balala nungi mongintem arua parnokisa asadanger aser Mokokchung coffee-ji junger ta ashiba den parnokisa tulujunga (bulk nung) aginür, saka tang tangbo asenoki parnok taginübaji metongtsüteter, ta ta pai kuli kar

dena ashi.

Tang market nung Mokokchung coffee-ji teküp dena akongba (dried beans) seret nung senpak 180/- agi alir aser teküp intoker akongba (parchment) seret nung 380-450/- agi aliteper. 'Nibo machine nung terara ronger (roast sür) seret nung senpak 1600/- agisa ayoker', ta ashi. Tangji par coffee lu koba Mangmetong lushi nung yimdar, yangji ita nung seret 50 shi züsenteter, ta pai ashi. Ano Tuensang, Noklak aser Shamator nung adokba coffee-tema saku tajung ta ashir, anungji, parnok indangjia tangalen nungi arua alia bener aor ta pa nungi angazük.

(Maneni tapak 2 nung...)

Tsiesemayimtsü nung aluyimer nem Natural Farming training agütsü



Tsiesemayimtsü nung March 6, 2026 nü Natural Farming indang training agidang tangokba noksa ka yangi angur.

Kohima, Metsüremi/March 11 (TYO): National Mission on Natural Farming (NMNF) kübok Natural Farming indang training ka March 6, 2026 nü Tsiesema village, Kohima nung Sub Divisional Agriculture Officer Chiephobozou, Department of Agriculture ajanga ayongzüka liasü.

Mhasikhotuo Mere, SDAO Chiephobozou, Department of Agriculture ajanga iba sentong tenzüka jembidang, aluyimer tem dang natural farming system amshitsü ajungmesoa liasü.

Pai aluyimer tem dang tzüngsang-mopung balala nungi jenbutüsü ajokba metsüjang, talisa Jobs tear aser foxtail millet

amala amshitsü, koba tzünglu marudanga ajunger aser local markets nunga jenjang tajung yokzüker, ta ashi.

Agriculture officers den SDAO Chiephobozou kübok Krishi Sakhis (CRP) temi bio-inputs amshia aluyimba nung jenjang tajungba kumdaktsütsü aluyimer dang ajungmesoa National Mission on Natural Farming (NMNF) 2025-26 kübok onük balala nung training agüja liasü.

Nagaland nung natural farming indang basic concept, nükla aser tetsükdaktsü balala indang training agirtem nem mezüng angazükdaktsü.

Iba sentong nung chemicals amshiba ajanga timtem

agütsüba indang onük nunga kongshia liasü, koba ajanga nisung takum nung kisüng masü saka libajen nunga kongshir ta ashi.

Natural farming kübok tashidak aser mesen ketdangsüba indanga iba training session nung angazükdakja liasü. Aluyimertem dang Light trap amshiba aser alu nung pa sasa adokba oset amshia mesen azüokba yimya sayua liasü.

Metsü aremba yimya, compost renemba, clean cultivation methods, soil health management aser agriculture entrepreneurship ajanga tetsür nem tashi agütsüba indanga sayua liasü.

Mokokchung ya Nagaland indang... (TAPAK 1 NUNGI...)



Tawa pa indang coffee tasting atema Gujarat-i India nung süngojok supplier tulu kadi or tendangdang, parnokia Mokokchung Coffee ji kanga junger ta ashi aser parnoki ita nung ton 5-10 (ton ka ji seret 1000 alir) tashi yoktettsü meyoktettsü? ta asüngdanga liasü. Tetezü parnoki asenok indang coffee jenjangji metetogo, ta pai ashi.

Ali ya asenok asoshi rongsen tulutiba lir aser asen lima ali peria kar. Coffee lu ayimtsü ali aser tzü mopung tapet, iba den asen lima adokba coffee-ji alima market nung demand kanga lir, anungji, asenoki ali ya tamshi ashitsüla, ta pai ashi.

Mokokchung ya coffee tajungtiba adokba tesem ka sütettsü ngujem tulu lir, ta pai

ashi. Coffee ji tapu balala lir, anungji, asen ali dak apet ayimtsüla, ta paisa shisem. Mokokchung Ongpanglen "Arabica coffee" aser azünglen "Robusta coffee" ajunger, aser coffee anapronglaji kanga junger, ta pai ashi. Nagaland indang coffee ya alima nung coffee tajungtiba rongnung mezüngbuba khen aser tanabuba jenjang khen ta adoka lir, ta paisa shisem.

Coffee lu koda ayimtsü? ta metetnüa asüngdangdang, coffee lu ayimtsü kecha balaka tasak masü. Süngdong marungtsü saka aih dang merüktettsü. Coffee yagi akhüm nüngdaker, anungji, coffee meyokdang mezüngbuba küm ka-ana süngjanglijang mesüra süngdonglidong kar atemtsü. Aji sür küm ana shi lir coffee-ji atem nung junger, ta pai

ajangshiba tasa kar agütsü. Coffee ya küm 4 nungbo aror, junga dang inyakra küm 3 nunga aror. Anungji, küm 5 tsüngta nungbo pei poksüngbo nguteta jangratema alitsü. Tazünger ajakibo sorkar mapa mangutsü, anungji, lanur karibo ali dangi meyiper coffee lu nung temulung agütsütsüla, ta paisa ayongzüker.

Nagaland nung coffee indang head office ya Mokokchung nung amendaka lir. Coffee Board lir aser Land Resources Department-ia senotsü den metsü (saplings) angati agütsür aser shisatsü nunga yariteper. Anungji, tejangrartemi parnokji bushia oa item teyari balala agitettsü akok. Iba dak sentakba nung tejangrartemi pa (Er. Philip) ajurua pa nungi shisatsü aginung junger.

Tsük lu mesüra kolar lu mesüra ano tanga lu ayimbajia majung ta mashir, saka item dang nungi coffee jenjang tuluba. Tanü Mokokchung coffee ya alimai kanga dang sabua jemteper aser market nung kanga demand lir, anungji, item ngujemji meteta coffee lu ayimtsü ajungshir aser Nagaland nung Mokokchung ya "coffee capital" ka kumdaktsütsü merangdi, ta pai ayongzüker.

Asenoki meranga inyaksüla aser Tsüngremi asenok nem moatsüba ali aser kechisarena (resources-tem) ji tamshi shia amshitsüla aser yangi nungi nashi mamatzü aser ninang mojitzüji tanen makai adokdaktsütsü merangtsüla, ta paisa ayongzüker.

NSCN/GPRN-R (Akato) indang Tatar Hohosenden ayonger

Dimapur, Metsüremi/March 11 (TYO): National Tatar Hoho indang speaker Tovi L. Awomi-i Hoito Village nung March 17 & 18, 2026 anogotem anepdang 10:00 ako nungi tenzüka Tatar Hoho ayongzüka lir, ta NSCN/GPRN-R (Akato) indang MIP sangdong ka ajanga ashi.

Iba senden nung yimten inyakyim, Naga National Political issues dak sendakba onüktem jembitsü, ta ashi.

Iba senden nung Political Wing, Tatars aser tema, Central Secretariat nungi, Under Secretaries aser tema aser Naga Army Wing nungi, Captains aser tema adentsü akok.

Iba den Tribal Regions aser UT (Union Territory) nungi Chairmans aser Secretaries densema nisung ter arua adentsü metetdaktsür, ta sangdong ajangasa ashi.

Agnipath Scheme atema registration tenzüka lir

Dimapur, Metsüremi/March 11 (TYO): Indian Army nung 2027 küm atema Agniveers shimtsü asoshi online Common Entrance Examination (CEE) atema Indian Army Recruiting Office, Rangapahar ajanga registration tenzüka lir, ta Additional Deputy Commissioner, Kohima, Ruopfukuotuo Noudi, NCS ajanga sangdong ka nung metetdaktsü.

Colonel, Director Recruiting,

Nagaland and Manipur ajanga shiti ka züluba nung, iba tatidang atema registration ya February 13, 2026 nung tenzüker aser April 1, 2026 tash alitsü, ta ashi.

Indian Army nung Agniveers ama adentsü jangra aliba tetemsü candidates temi Indian Army indang official website www.joinindianarmy.nic.in nung online ajanga apply asütsü ayongzüker, ta sangdong ajanga ashi.

Tzü merükba Neebaqua agi Nagaland tongogo



March 11, 2026 nü Hotel Saramati nung NEEBAQUA Scientific Water Treatment Device sayaba sentong nung company purtemi tzü merüktetba indang mapa agi inyaka sayuba noksa nung angur.

Dimapur, March 11 (TYO) : Asenok taküm ya tzü nung dang amendaka lir, tzü melira temang taküm melitetsübjabo toktsür, terenlok mapatema meiyaktettsü aser alua meyimtettsü ta MSME PCI Nagaland mendenbuba Wb. Lanuaküm Jamiri metetdaktsü.

Pai iba o ya tanü Rasemnü yangi Hotel Saramati nung NEEBAQUA Scientific Systems Pvt. Ltd. purtemi yanglutetba tzü merükba "Advanced Water Treatment & LDI Technology" osettem Nagaland aser Northeast nung amshitsü asoshi sayaba sentong nung temang anema alitsü asoshi tzü tasüngtet, temerük aser tajung ajemtsü asoshi kanga nüngdakba indang tangatetba ka lokti den lemsatepdang metetdaktsü.

Iba ama tzü merüktetba technology tajung aser zübazüba amshitettsüba oset NeebAqua Scientific System Pvt. Ltd. purtemi Nagaland tashi bener aruba yagi nübortem tzü tajung ajemba dang masü saka lanurtema mapa angutsüsa lenmang tajung lapoktsür ta paisa ashi.

Iba sentong nung NeebAqua company nungi parnokji

yanglutetba tzü merükba 'Scientific Water Treatment Device' indang rasaa ashidang, NeebAqua ajanga magnet agi merüktetba tzü agi temang telonglen dang masü saka temang nung teküp tajungba kumdaktsür aser tokolak nung ku atsüba aser tezüng nung long akümba timtem nungi kümzüler ta metetdaktsü.

Ibai tzü ajemtsü asoshi dang masü saka alu nung aser mapa inyakkad amshira tzünüsenpongtsü tajungba adoktsü aser mapaa takangba asütsü ta parnokisa metetdaktsü.

Iba NeebAqua oset enoktsüba mapa ya tasak masü, ibai tzü arua aliba pipe nung dang melamelaa enoktettsü aser light tashia menüngdaker. Ibai mapang mapang shia repranga anepalutsüa menüngdaker aser arishi tepiyong amshitsüba oset ka lir. Ano, tajung kaji, iba tzü merükba oset ya ainlen jajadang bener senzütettsüsa tila dena yanglua lir.

Iba NeebAqua ajanga yangluba Scientific Water Treatment Device ya MSME Promotional Council of India, Nagaland ajanga Nagaland nung jenjang dalangba nung ayok tenzükttsü.

Taranjit Singh Sandhu-i Delhi LG tenangzükba agiogo



March 11, 2026 nü New Delhi nung Union Home Minister, Amit Shah-i Delhi Lt Governor menden atema shima alisang, Taranjit Singh Sandhu ajurudang tangokba noksa nung angur.

New Delhi, Metsüremi/ March 11 (Agencies): Taoba mapang ketdangser, Taranjit Singh Sandhu-i Bodhbarnü Delhi Lieutenant Governor (LG) tenangzükba agiogo.

Delhi High Court nung Chief Justice, Devendra Kumar Upadhyaya-i ketdangsüa Sandhu nem tenangzükba agidaktsü.

Iba sentong nungji Delhi Chief Minister Rekha Gupta den cabinet züngsemtem aser tongti ketdangsertem aika liasü.

Tenangzükba agiba sentong tembangba sülen osangbenertem den jembidang Sandhu-i, Delhi ya pa atema

'mapa inyakba tesem' amai lir, ta ashi. Paisa, pa Delhi nung aliba college aser university nung azüngba sülen Delhi nung foreign service officer inyaka liasü, ta metetdaktsü.

"Yangi stakeholders aika lir, aser Delhi nung terenlok atema asenok ajaki longjemer inyaktsüla," ta paisa metetdaktsü.

"Linük yimtiba nung tebilemtsü onük aika alibaji ajaki meteta dang lir. Item tebilemtsü bentettsü atema sayatenya mali saka asenok ajaki longjemer inyaktsüla," ta pai ashi.

Bodhbarnü Lieutenant Governor tasenbai Rajghat

semdanga linük tebuti, Mahatma Gandhi nem akhüm agütsü aser Connaught Place nung aliba Rakabganj Gurudwara o Prachin Hanuman tekülem ki na nung sarasadema liasü.

Sandhu-i Vinai Kumar Saxena melenzüker. Delhi LG menden nungi anensang Saxena ya Ladakh Lieutenant Governor shimogo.

Tamalen Sandhu ya Washington D.C nung aliba Indian Mission nung aiben inyakogo aser 2020 küm February nungi 2024 küm January ita tashi India's ambassador to US inyaka liasü.

Middle East rara nung India nunger ana asü; ka samaogo: MEA

New Delhi, March 11 (Agencies): Tang Middle East nung raraba mapang khu abenba rong ka amakba tatalokba nung India nunger ana asü aser ka samaogo, ta Bodhbarnü Ministry of External Affairs (MEA)-i metetdaktsü.

MEA otongdar, Randhir Jaiswal-i, sorkari iba tensa mita repringdar aser akokba tashi takoksa anguba sensotem aser parnok kibongtem den yaritepdar, ta metetdaktsü.

"Nisung kar asüba osang lir. India nunger ana süogo aser ka samaogo. India nunger asemji süogo mesüra samaogo. Khu abenba commercial rong ka amakba lendong nung parnok sama," ta Jaiswal-i

metetdaktsü. MEA-isa, tang Gulf region nung raraba mapang yiruba India nungertem medical treatment agidar, ta metetdaktsü.

"Asen consulate-i parnok den tongtepratepdar. Tanep Dubai nunga India nunger ka yiruba osang nenoki angashir asütsüa akok. Asen consulate-i pa den tongtepratepdar. Pa hospital nung treatment agidar. Onoki pa den maneni tongtepratepdar," ta Jaiswal-i metetdaktsü.

West Asia nung tensa tamajungba akümba mapang nung India nunger den tongteprateptsü atema India sorkari control room ka

amenokogo. "Onoki control room ka amenokogo aser sensotem yaritsü aser nungittsü atema onoki phone call aika agizükdar," ta pai metetdaktsü.

West Asia nung rara tenzükba sülen tzüyim nung rong aika maakdar, talisa khu abenba rong senzüba tongti lenmang 'Strait of Hormuz' aser temeket nung rong aika maakogo.

Bodhbarnü kija nunga Strait of Hormuz nung commercial rong asem amak.

Shipping company aikati iba tesem nung rong senzüba anenogo aser totzü abenba rong aika anasa aliba tzüyikümtem nung anendaka lir.

Jaishankar-i Iran Foreign Minister Seyed Araghchi den jemb

New Delhi, March 11 (Agencies): West Asia nung rara ajanga totzü supply mejungi kongshiba dak sendakba nung External Affairs Minister, S. Jaishankar-i Iran Foreign Minister, Seyed Abbas Araghchi den jembio.

West Asia nung rara tenzükba sülen tang agi tasembenbuba Jaishankar-i Araghchi den jemb. Iran-i khu abenba rong lenmang 'Strait of Hormuz' shibangba ajanga alima tesem aika nung totzü agi anünger.

Jaishankar-i X ajanga, "Nikongdang Iran Foreign Minister @araghchi den tang rara aliba tensa atema jembio. Künati maneni tongtepratepa alitsü bangjemogo," ta metetdaktsü.

Iran-i tongti lenir, Mojtaba Khamenei tenüng sangdongba sülenbo tang mezüng Jaishankar aser Araghchi na jemb.

Jaishankar aser Araghchi na

phone ajanga jembiba mapang nung March 4 nü Sri Lanka anasa US sepaitemi Iran nunger raraba rong amakba indang-a jembir asü mejembiar mejangja.

February 28 nü Israel aser US nati senteper Iran amakba anogo nungsa Jaishankar-i phone ajanga Araghchi den jembia liasü, iba sülen March 5 nüa lenir ana tsüngda jembio.

West Asia nung rara tenzükba sülen Iran-i Strait of Hormuz shibangba ajanga alima tesem aika nung totzü aser gas jenjang kanga tuogo.

Mongolbarnü Jaishankar-i Germany Foreign Minister Johann Wadepful den-a jembia West Asia tensa atema tebilemba lemsatapa liasü.

Jaishankar-i South Korea Foreign Minister Cho Hyun den-a phone ajanga linük ana tesendaktep atema jembiba den külemi West Asia nung rara ajanga alima tesem balala nung energy sector jenjang mejungi akümba atema o lemtepdar.



New Delhi, March 11, 2026: Bodhbarnü Lok Sabha senden nung Azad Samaj Party (Kanshi Ram) MP, Chandrashekhar-i jembidang tangokba noksa nung angur.

Parliament ajanga dang CEC agientsü akok

New Delhi, Metsüremi/ March 11 (Agencies): Kodang House ka nung judge agientsü atema benokdir Gyanesh Kumar chief election commissioner (CEC) menden nungi agientsü atema opposition-i Parliament nung benoktsü.

Tang mezüng CEC ka menden nungi agientsü atema notice agütsütsü.

Opposition party temi, CEC Kumar-i ruling BJP pusema inyaker, temsüa aliba voters electoral roll nungi agiener aser vote auyaba tsütsü pai BJP pusemer, ta aitsür.

Ozüng kübok CEC ka office nungi agientsü makok, ajisüaka Supreme Court nung judge ka agienba telatetba yimya nung agientsü akok.

Iba dak alia CEC-i benok ka mesüra election commissioners-a office nungi agientsü makok.

Supreme Court aser High Court nung judge temji Parliament-i dang agientsü akok; yamaji CEC-a Parliament ajanga dang agientsü akok, aser iba inyakyimji Judges (Inquiry) Act, 1968 nung shia lir.

Kodang notice ji Parliament House ka mesüra ka nung agizükdir Parliament nung motion ka benoktsü. Iba atemaji Rajya Sabha nung ishiba agia züngsem 50 aser Lok Sabha nunga ishiba agi züngsem 100-ibosa agisütsüla.

Kodang House ka nung judge agientsü atema benokdir Speaker mesüra Chairman-i ibaji asadangtsü/ bushisüngdangtsü atema züngsem asemi benokba committee ka tentettsü.

Committee nung züngsemtemji- Chief Justice of India (CJI) mesüra Supreme Court nungi judge ka, high courts 25 nung aliba chief justice tem rongnung ka asütsü aser 'distinguished jurist' ka alitsü.

Ibaji bushisüngdangba mapang nung committee matsüngdang jembitsü atema CEC nem-a maongka agütsütsü. Kodang committee report ji ngudir House nung benoktsü aser menden nungi agientsü atema o lemtepdar tenzüktsü. Judge ka mesüra CEC ka menden nungi agientsü atema House anaprongla nung agizüktsü nüngdak.

Ano külen CEC kati pasasa pa menden nungi anener, ta sangdongtsü akok, aser pai tebang agi ashibaji agizüktsü.

Pai pasasa menden nungi anentsü telemtepdar agira pa nem pension den tanga benefits balala agütsütsü, ajisüaka Parliament ajanga pa menden nungi anendaktsüra pa nem pension densema tanga teyari kecha magütsütsü.



New Delhi, March 11, 2026: Linük tesem ajaklen LPG gas agi anüngba dak sendakba nung Bodhbarnü New Delhi nung AAP tongti lenir, Arvind Kejriwal (tiyong) den party MP Sanjay Singh aser party lenir, Jasmine Shah nungeri osangbenertem den jembidang tangokba noksa nung angur.



TIR YIMYIM YIMOBILEM (EDITRIAL)

DIMAPUR THURSDAY, FEBRUARY (METSUREMI) 12, 2026

Ibai alima rara !

Rarabo oagi West Asia nung rarar, anungji Iran aser Israel na tsüngda amang nunga anüing ajak merema tetsübutsü bomb tesashi yoktepa ola asenoki mangashir aser tangua mangur. Ajisüaka, America aser Israel nati Iran amak tenzüker joko tanü agi anogo teranabuba nung, Iran-i par temeket nung alir kidanger kintem Saudi Arabia, Kuwait, Bahrain, UAE, Oman, Qatar aser Jordan linüktem dena ajak makyonga aoba agi, joko, alima ana asemka tsüngdaji dang masü saka alima kintem aika iba rara nung shilem magi majungtsüsa ayonglokogo. Atangji, tang tashibo alima nung kin tulu China, Russia aser India linüktemiba iba rara nung teben amuokabo shilem magii lir, ajisüaka Iran-Israel aser US rara nung shilem agi-magi ta mali, iba rara ajanga timtem tekangshibo alima ajaklen atongtsü. Item timtem ajururtem rongnungji, ashiko, timtetemtibaji asenok Nagaland nung alir Naga nung asüsüa akok, kechiyong iba rara ya ita junga ao nungbo asenok ama tangar lu nung züsentetba agi taküm alirtembo chiyongtsüa mangu yawara agi atongtsü ana nung dang lir. Atangji, asenok asoshi Israel aser US na pronglaji tembar aser tongtibang kin lir saka Iran nungi adokba totzü agi dang asenok ajak nungdakbo peritsür. Aji oda, US kija atema anogo shia Iran nungi Strait of Hormuz tzüim lenmang ajanga totzü barrel million 20 bener oa liasü aser India nunga anogo shia atsükba totzü 40 % bo kasa tzüim lenmang ajanga Iran nungi India-i bener arur. Aji oda, tanüngba 60% nungji India nung adokba agibo 15 % dang perir aser tanüngbaji Russia aser tangalen nungi bener arur. Ano, totzüji dang masü saka linük nung asenok nungdakba soruchiokba gas-a 60% bo tangar limatem nungi bener arur aser iba 60% nung jagi 90% bo kasa Strait of Hormuz tzü lenmang ajangasa bener arur. Tanübo asenok ajak asoshi shisabolutsükaji, asenok asoshi Iran nungi totzü aser gas bener aruba tzü lenmang "Strait of Hormuz" ji shibangadokogo aser iba tzüji ajanga rong kata ajanga mesüiteter. Atangji, tang tashibo linük nung totzü agi anüngba aser meperiba osangbo mali saka joko soruchiokba gas agi anüngba aser meperiba agi timtem ajuruba osangbo lir. Aji oda, iba alima rara ya manentet talangka ora, soruchiokba gas mengui akümstsü, anungji akhi tsürabur mapang ama asenoka süng agi soruchioktsüsa akümstsü, kechiyong light tashi agi soruchioktsübaji jenjang tasak akümstsü. Iba denji külemi ano kodang linük nung totzü agi anüngdir, anüng nung tayimtsü aser ali nung gari senzüba jenjang tuadoktsü, anungji tayimtsü aser gari nung amenba aser abenba jenjang chiyongtsü aser osettsüset ajak nung tuadoktsü. Ashiko, idangjibo tang jang seret nung sen 50 agi alia aliba ya noklang agi alitsü, alo aser beaz-a seret nung noklang junga meshitsü. Yin aser merang nung sen kaketa tuadoktsü, anungji asenok aika kisü jensü mapa mekoki anenadoktsü. Iba ama mapang nung mapa inyaker ita sen aser anogo sen atutsübo makoktsü, anungji senbo kasa angur saka pei taküm aser kibong mesütsü asoshi jenjang tasakba akümstsü. Item timtem jagi asenok matong dang, asenok dangi arua asenoki angutsüla aser iba timtemji koktettsü atema asenoka asen yari jet ta aluyim tenzüksüla. Atangji, asenoki item timtemji aruya ngur asenok nungdakbatem alioka ayutsüa akok, saka asenoki jilia alioka ayuba jagi asenok kopiga otettsü ? Aji khen atema dang aser rara anenyonga asenok nungdakbatemji jet ta yaktabo mangutsü, kechiyong West Asia lenji totzü adokdak aser moludak tesemtem kanga mejungi raksaogo. Alima nung nisungtem mesamai taküm liyonga otetba ya tarutsü tensa mapang meteta inyaka ataba nungi tashi ngua litetter. Ibai angateta, asenokia asüng ataloktsüba alima tensa tiaji rajemtetsüla aser chiyongtsü agi nisung taküm alir süra asenoka asenok peribo chiyongtsü züsenteta alitsüla. Tangar amaji asenoki ita petinui atutsüsa rocket meyanglutettsüa akok mesüra tangar den raratsüsa missiles aser drone meyanglutettsüa akok, saka asenoki asen chiyongtsübo asen li nung asen teka agi züsentettsü. Iba amajika asenoka asenok taküm alitsü asoshi danga renema matara, tangar missiles aser drone amshia raratepdang asenok chi maka aya agi asütsü.

OLEMSABANG

TANÜASEN LIMA NUNG AROGOPURTEM ASER AROGO TENZÜKERTEM TAMANG JENJANG

~ L. Kika Pongener.

Tanü asen lima nung arogopurtem tamang jenjang asadanga reprangdangra; tekülem sentepi arutsü atema-a tongtipang sentong ka alidang-ang longso-longsoa arur. Tongtipang sentong (Special Program) amangba tamangertem teimba küma odagi. Christmas aser Newyear benjong sentep nungpo tenla kidang masemi senteper. Revival sentep nunga tenla kidang masemi senteper. Aein-longiner sayutsüngir tasen kar arudangpo tenla kidang masemi senteper. Ano Fathers' day aser Mothers' day ama sentep nunga tenla kidang masemi senteper. Tongtipangsa kodang sentepi arur ajak nem senpet lemstsütsü ta sudir....Iba amala sentep nungpo longso-longsoa senteper. Ano arogo dak sentakba Ministry balala sentep nunga reprangdangra; sentepi longsoa arudaktsütsü atema mapang shia "Special Program" balala yanglur; sentepi arur ajak nem senpet lemstsütsü aser chiyungteptsü/sungo jemteptsü ta kodang sudir; iba amala sentep jagipo longso-longsoa arur....!!! Talisa, Aor tamanger küm-150 sua amangertem tamang....Tang tila tanürtem 'Nanglong' (Metai/Sweets) agi mesuzüka sentepi arudaktsütsü ayungshia ajaba amai kümadokogo. Naga nung rongnung mezüng tamang yimsu agizüker kin-to amanga-amanga benjong-bentsü amanger; aeiner tasen amanger; chiyongtsü aser senpet agi mesuzüka sentepi arudaktsütsüba tamang jenjang tashi aküm nooo...??? ta kangasa sungmanga bilemer....!!! Jokorla, tang yabo Aor tamangertembo tamang nung teintet rogo aser tamangdir teimba asütsüba mapang ka lir....Ajisuaka, tang Aor tamangertem kinu tanür amai chiyongtsü aser senpet agi mesuzüka amangtsüba mapang ka masü.

Ano arogo nung tenzükertem tamang jenjang reprangdangra; arogotem nung tenzüker teimba kati sen "Budget" ya ajak dang tongtipangba kümdaktsür tenzükbang anur. Arogo dak sendakba Ministry balala nung tenzükertem aika 'Budget' kwika lemzsütsür (?) Ibai ajak dang tongtipangba kümdaktsür. Surabangla, arogo nung tenzükbang nukjidong tulutibaji sen amshitsüba ya asü (?) Arogo nung teinyaktsü mapa ya sen alinung dang inyaktettsü asü (?) Sen alinung dang kipoksem aser sarasadem-ia aotsü asü (?) Sen alinung dang arogo mapa nung temulung agüja aser bendanga agüja tenzüksü asü (?) Hau....arogo nung terenlok mapa inyaktsü atema sen nungdaker....Saka inyaktsü temulungtetba dang lira; sen meden-ia inyaktettsüba wadang karbo lir. Anungji sen 'Budget' ya mapa ajak dang tongtipangba mekümdaktsütsüla. Arogopurtemi tershilem aser tamang tenla aika mulungsoa agütsür; aser aji tanela anir arutsü aser tenyaba mapa inyaktsü agütsür. Ajisuaka, tenla sen aika arurji ta ser....Menungdakba 'Project' tapu-tapu 'Budget' yanglur endoktsü asü (?) Nungdakba dang nungi talila lalushiponga amshitsü asü (?) Chidiyungdi nung lalushiponga endoktsü asü (?) Mesura tenla aika arurji ta ser toklang tenzükertema 'Luxury' sua alitsü asü (?) Aji oda, Khristar arogo rongsenji tim lenmang nung kanga kümdanga ochishia amshitsüla. Sen kisung agi arogo kaji taküm malitsü aser tanela nung maintsü. Asenok tang yabo sen (Budget) dak rangloker tenzüksüba/amangtsüba mapang masü; saka tamang jenjang nung teintet (Matured) akümstsü; aser koba-teka timtem toudhi arur; patakaji tanela jenjang nung temaleni tua aintsübaji ajak dang tongtipangba sudaktsütsüla.

Arogo ka taküm aliba arogo ta ajatsübaji; toklang tenzükertemi anir Ministry, Committee aser Board balala nung tenzüker ajaki pei mapa nung tamakok maludaktsüi; nendak-nendaka tenzükbang agi dang arogoji tashi-ita taküm alitsü. Toklang tenzükertemi arogopurtem mapang ajak nung tanela chiyongtsü tasen-tasen melentepa; Tsüngrem o agi mesuba agi dang arogoji tanela nung aintsü. Toklang tenzükertemi anir tela-tenuk balala nung tenzüker ajunga teti tekülem sentepi meranga arua; arogopurtem tanela nung ajungshiba agi dang arogoji tashi-ita alitsü. Toklang tenzükertemi anir tenzüker ajak; achi-ajem nung azüoka litetba; aser taküm libaliru asüngteta aliba tenzükertem asütsüla. Ajak dak alia, toklang tenzükertemi kipoksem nung tali temulung agütsütsüla. Toklang tenzükertemi kipoksem senzüka yutsüra; azümesena tenzükra; aser zübazülema tenzükra; arogoji tanela nung tasü (Dead) arogo ka asütsü. Talisa, toklang tenzükertem tsüngda nung kati ka akümstsüba, kati ka küpok lia; parnok tsüngda nung telongjem aser tesendaktep tajung lia; arogo inyakyim tazüokba küpok lia; ajemalua tila kümer tenzükra; arogoji tashi-ita tanela nung aintsü. Anungji arogoji taküm aliba arogo aser tanela nung ainba arogo asütsü asoshi toklang tenzükertem ka küma longjemtsüla.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

'Esperanza Lima' sentong nung nisung meyrjang aikati Khrista agizük



Peru yimtiba, Lima nung Billy Graham Evangelistic Association (BGEA)-i ayongzükba sentong nung adenertem tangokba noksa nung angur.

March 11, 2026: Anogo ishika tejaklen Peru yimtiba, Lima nung Billy Graham Evangelistic Association (BGEA)-i ayongzükba sentong ka nung nisung meyrjang aikati Khrista agizük.

Sayutsüngir Franklin Graham-i nisung 90,000 dak tema den Khrista osangtajung lemsatep aser aikati Khrista nem taküm bendanga agütsüogo.

"Esperanza Lima" outreach sentong ya Lima nung aliba National Stadium nung Honibar aser Amongnü (March 7-8) anogotem nung agia liasü.

Tsüngrem O asoshi aikati tzüraba ajanga nisung aika stadium telungi meyitet kima nungi dang Tsüngrem O anga.

Iba sentong ayongzükba agitsü asoshi BGEA-i local Arogo 2,400 teyari agia liasü. Stadium-i aotsü asoshi BGEA-i aonung shia bus 600 angati agütsü.

Aonung ana sentong nung Khristan kentenerem- Charity Gayle, The Afters, Christine

D'Clario aser Jahaziel Band-i ken aika aten aser Rev. Franklin Graham-i sayutsüngi.

Rev. Graham-i, "Kuli ka ajanga ni yagi aru, aser ibaji ochi lemsatepsü atema lir. Yisu Khristai yamai ashi, 'Ni lenmang, atangji aser taküm'. Tanonung nai Tsüngrem chir Yisu Khrista ajanga taküm tasen ka alangzükttetsü," ta ashi.

"Alima tesem ajunga temenen agi amokbangogo. Yisu medenibo na asoshi teimla mali. Nai nüsasa mekümzükttetsü. Nai nüsasa tai metokttetsü. Arogoi na mekümzükttetsü. Yimsü ajanga na mekümzükttetsü. Ajisüaka Yisu Khrista azü ajanga dang na kümzükttetsü. Paji dang lenmang. Nü menen alangzüktsü atema Pa kodak nungi alimai alu. Na asoshi Pa azü ayim aser Kangki nung asü. Taonung nai Pa dak amangang aser nü menen nungi kümzükba taküm tasen alangzükang," ta pai ayongzükba liasü.

Ajioda nisung meyrjang aikati Yisu Khrista agizük. BGEA den jembidang apuani, Oscar Nuñez aser Karina Arcela nati, "Onok taküm nung mabensai aliba onoki ngutetogo. Tsüngremi onok sarasadem ajak angashir ama ni bilemer," ta metetdaktüsü.

Arcela-i, "Tsüngremi kü dang tai matok, ta ni bilema liasü, ajisüaka taonung Tsüngrem O ajanga jangjaogo. Yisuji kü kümtekdakba lir," ta ashi.

Tesüiba ita ishika tsüngda Franklin Graham-i Ushuaia, Argentina; Siem Reap, Cambodia; Buenos Aires, Argentina; Brussels, Belgium; London, England aser Addis Ababa, Ethiopia linüktem nung sayutsüngia aruogo.

1989 küm nungi tenzuka tang tashi nung Rev. Franklin Graham-i linük 55 nung outreach sentong 345 nung sayutsüngiogo.

Pai maneni Spain yimtiba Madrid aser Manchester na nung sayutsüngitsü.

Maharashtra nung anti-conversion ozüing benoktsü atema renemer

March 11, 2026: March 5, 2026 nü Maharashtra state sorkari draft anti-conversion bill agizükogo, aser iba ozüing ya renema benokra nisung kati tamangba yimsü melentsü atema jelia ketdangsertem dang nungi temelaba meshitsü nüngdaktüsü.

Dharma Swatantrya Adhinyam 2026 (Religious Freedom Act, 2026) ta ajaba draft bill ji ozüing kümra iba ozüing kübok nija mesüra organization balalai tamangba yimsü meyipdaktüsü nokdangtsü.

Anti conversion draft bill ji Maharashtra assembly nung benoktsü aser ibaji agizükra maneni linük Tir matsüngdang benoktsü; iba sülen ang ozüing akümtsü.

Iba ozüing kübok mesüzüka mesüra ashikülak ajanga tamangba yimsü meyipdaktüsürtem küm 7 tashi tepuokdak ayutsü aser senchi sen lakh 5 tashi achitsüa akok.

Iba ozüing kübok Uttar Pradesh state tem lir. Maharashtra nung BJP lenir, Nitesh Rane-i, cabinet-i anti-conversion ozüing agizükogo aser ibaji yaküm state assembly election mapang nung nangzükba ataloktsüba lir, ta ashi.

Rane-i, "Assembly elections mapang nung onoki, sorkar akümba sülen onoki anti-conversion ozüing tesashi benoktsü ta nangzükba liasü, aser tanübo iba ama ozüing ka cabinet-i agizükba ajanga ni kanga melung asür," ta metetdaktüsü.

Ano külen Maharashtra Legislative Assembly nung opposition lenir, Vijay Wadettivar-ibo, "Iba ama anti conversion ozüing ka ajanga parnoki (Maharashtra sorkar) kechi kuli sayuner. Maharashtra nung tanga tebilemtsü onük aika lir, ajisüaka parnoki iba bill benokba ya yimsü ka anema dang lir," ta metetdaktüsü.

Tang India kübok anti conversion ozüing benoka aliba state 12 ji Arunachal Pradesh, Chhattisgarh, Gujarat, Haryana, Himachal Pradesh, Jharkhand, Karnataka, Madhya Pradesh, Odisha, Rajasthan, Uttarakhand aser

ANOGO ABEN TSÜNGREM DEN

Temerük aser tejangraba

"Shibai tanelatem anir arur shisa taka"

(A. Shin 11 :30)

Alima mapa tulutibaji tanelatem anir arutsübaji lir. "Kechiaser nisungi alima ajak ajangzükter pei tanela samadokra kechi ajangzüktsü?" (Mk. 8:36). Alima nung shisa takatiba mapaji tanelatem anir arubaji lir. Kechiaser shibai pei kiyonger teti tatem maka taküm asoshi renemtsür, pa alema ano shiba shisa takaba lir? (A. Shin 11:30; Dan. 12:3). Tepelatiba mapaji tanelatem anir aruba mapa. Kechiaser sannükeri samaba san ngur pelaba tepelaji kechi den medemdangtsü? (Lk. 15:5-7). Meimchir nem nüngloksüba tematibaji tanelatem anir arubaji lir. Kechiaser Tsüngremer tepela aser tesünep osang abener ka tetushi dang nungi temaba kechi tetushi ali? (2 Kor. 5:18-20). Khristan mapatem nung tanelatem anir aruba wadang ngujema alibaji shisa takatiba wadang. Kechiaser Khristan ajaki ajaklen mapang ajak nung iba mapa inyaktüsü akok.

Tanelatem anir aruba nung tongtipangtiba aser mezüngbuba mapaji jembiba ama jajatsüla. Khristan yimsü asoshi tajungtibaji Khristantem lir. Saka tia maka, Khristan yimsü anema tashi taitba telangzürji Khristantem lir. Asenoki kechi ashir iba den putepa asenok taküm alitsüla. Tanela anir aruaka, Yisuji temenen nungi kürnzüksang ta takok ngua meliteta, ibaji lemtsüi ku totzü tali alokba mesüka lir. Paul taküm emerük aser osangtajung agütsüba ajanga teraksa governor atentendaktüsü (T. Mapa 24:16,24,25).

Yaküm Laishiba ayokba shilem 19 agi teimba aküm: NielsenIQ BookData

March 11, 2026: Yaküm UK nung Laishiba ayokba shilem 19 agi teimba aküm, ta NielsenIQ BookData indang report ka ajanga metetdaktüsü.

Tan hopta Olympia London nung London Book Fair agitsü jelia NielsenIQ BookData-i 2025 indang report ji sangdong.

2024 küm den medemdangra 2025 küm Laishiba ayokba shilem 19 agi teimba aküm; pound sen million 6.3 yokzükba liasü.

Christian book publisher SPCK-i ashiba agi, UK nung 2019 küm Laishiba ayokba den medemdangra 2024 küm nungbo shilem 87 agi teimba aküm.

SPCK-i ashiba agi, tanur-tain ajaki Laishiba kanga bulua aliteper, ajisüaka Laishiba alizükertem teimbaka lanurtem lir, aser ibaji ajanga talisa lanurtemi Laishiba azüngtsü jangraba kuli jangjar.

"Iba ya publishing dak sendakba otsü ka dangbo masü saka temelenshi aliba lima ka nung nisungtemi taküm nung tetezü bushiba temaitsü lir," ta SPCK-isa metetdaktüsü.

SPCK nung publishing director, Lauren Windle-i, Laishiba kanga sapua alitepbaji ajanga lanurtemi alimai magütsütetba ka atema tzüraba sayur, ta ashi.

Küm ka tejaklen Bible Society-i Quiet Revival report sangdongba sülen nisung aikati Laishiba dangi meyipba aser Khristan yimsü agizükba osang aika lir.

Kasa report ajanga ashiba agi, ita shia taintem shilem 12-i khenbosa Tenla kidangi aoer; 2018 küm nungbo ita shia Tenla kidangi khenbosa aoer taintem shilem 8 dang liasü.

Ano külen A Passion for Life & Whitestone indang report ajanga ashiba agibo, ita shia taintem shilem 15-ibo ita nung khenbosa Tenla kidangi aoer, ta metetdaktüsü.

UK nung Arogo karibo Tenla kidangi arurtem kanga tiemba kümogo, ta ashi.

Church of England-i, yaküm Easter Sunday nungi tenzuka Christmas atongtsü mapang tashi nung Tenla kidangi arurtem kanga renloka liasü, ta metetdaktüsü.

USA nung World Cup asayatsü Iran nokdanga mali: Trump



Metsüremi/March 11, 2026 (Agencies): 2026 FIFA World Cup tenzüksü ita asem dang anunga lia rara adoker aliba ajanga Iran team iba asayamung nung asayatsü masayatsü mejangjai lir, koba USA nunga asayatsü lir.

Ajisiüaka FIFA tir Gianni Infantino-i Mongolbarnü ashiba agi, pai US tir Donald Trump den sensaksemogo, shibai pa dang Middle East nung mepetmesü adoker liaka Iran football team iba asayamung nung shilem agidaktsüsi atema pelashishia agizüksü ta tenangzüka agütsüogo.

Taküm World Cup ya Canada aser Mexico na den külemi US nung June 11 nungi July 19 nü tashi asayatsü. India team New Zealand den June 15 aser Belgium den June 21 nü Inglewood (California) nung

asayatsü aser iba sülen Egypt den June 26 nü Seattle nung asayatsü.

"Tanü nikongtsüsi ni United States tir Donald J. Trump den ajurutepa taruba FIFA World Cup atema renemshiba asadangogo," ta Infantino-i Instagram nung zültsü.

"Künati Iran nung tang tensa mejungi aliba indang sensaksemogo aser Iran team FIFA World Cup 2026 atema qualify sür aliba indanga jembiogo. Sensaksem mapang tir Trump-i, Iran team United States nung iba asayamung nung tokteptsü atema kecha tenokdangba mali aser pelashishia agizüksü ta shiogo," ta pai shisem.

Iran Football Association tekolakbai parnok taküm iba asayamung nung shilem magitsü akok ta shiogo.

Ajisiüaka Iran iba asayamung nung shilem magira parnok dang senchi achitsü aser tarutsü nung FIFA asayamungtem nung shilem magidaktsüsi akok.

"Tanga mapang dang nungi tang ya nüburttem longjemdaktsüsi asoshi FIFA World Cup amala sentong ka asenoki kanga nüngdaka lir, aser ni United States tir dang pai iba sentong pusemba atema kanga pelaba lemsateper, kechiyong iba ajanga Football asaya yagi alima longjemdaktsür ta sayur," ta Infantino-i ashi.

Taoba mapang Trump-i Politico dang Iran-i team FIFA World Cup 2026 asayayonga masayayonga pai kecha süoki ia bilema mali ta shir liasü. Iran ya FIFA World Cup 2026 atema qualify asüba mezüngbuba team liasü.

Arshdeep Singh nem ICC-i temerenshi agütsü



Metsüremi/March 11, 2026 (Agencies): Deobarnü Ahmedabad nung New Zealand national cricket team den T20 World Cup 2026 final asayaba mapang International Cricket Council Code of Conduct Level 1 nung aibelenba atema India nung fast bowler Arshdeep Singh dang pa indang match fee shilem 15 senchi chiogo.

Arshdeep yagi ICC Code of Conduct for Players and Player Support Personnel kübok Article 2.9 nung aibelenba ngutetogo, koba international asaya ka nung ball (mesüra tanga cricket asayadang

amshiba hadir) asayar dak mesüra asayar anasa tim mesüi aser lendong ataloktsüsa mereploksüba dak sendaka lir

Senchi achiba den külemi Arshdeep indang disciplinary record nung demerit point ka bendenloktsüogo. Iba ya pa asoshi ita 24 tsüngda mezüngbuba aibelen liasü.

New Zealand pur batting amenba mapang over 11buba nung Arshdeep-i batter Daryl Mitchell indang pads nung ball mereploksüba liasü

Emirates ICC Elite Panel of Match Referees, nungi Andy Pycroft-i temerenshi agütsüsi

benokba ya Arshdeep-i agizükogo aser iba tetezü ken o angadangtsü nüngdak madoktsü.

On-field umpire Richard Illingworth aser Alex Wharf, third umpire Allahuddien Paleker, aser fourth umpire Adrian Holdstock nungeri iba taitüsüba ya benoka liasü.

Level 1 nung aibelenba atema temerenshi tajemtibaji ketdangsurtemi merenshia temetongshitsü agütsüba lir aser tesashitibaji asayar ka indang match fee shilem 50 den demerit point ka mesüra ana agütsüba densema lir.

Asayar kati kodang ita 24 tsüngda demerit points pezü mesüra iba dak tema bendendir item point tem ya suspension points kümdaktsür aser iba sülen asayatsü asoshi tenokdangba agütsür.

Suspension points ana ngura Test ka mesüra ODI ana mesüra T20I ana ta koba tama denchidir iba atema tenokdangba agütsür.

Demerit point tem ya ita 24 atema asayar ka indang disciplinary record nung alir aser ita abensaba sülen aginer.

T20I Rankings: Abhishek maneni temaba jenjang nung lir

Metsüremi/March 11, 2026 (Agencies): Tawa sayaba International Cricket Council Men's T20I batting rankings nung India nung opener Abhishek Sharma maneni temaba jenjang nung lir. Tawa tembangba T20 World Cup 2026 nung junga masayatetaka pa maneni temaba jenjang nung lir.

March 8 nü Ahmedabad nung final asaya nung New Zealand team run 96 agi akokba sülen anogo ishika lir rankings ya update sütsüogo. Iba asaya akokba sülen India team ya T20 World Cup asem akokba mezüngbuba team kümogo.

Asayamung nung junga masayatetaka Abhishek-i rating points 875 ngua pa maneni temaba jenjang nung lir. Asayamung tetenzüki pa asaya asem atonga duck achi, saka final asaya nungbo junga asayateta half century ka yanglua liasü.

Final nung Abhishek-i ball 21 nung run 52 yanglu. Pai four pezü aser six asem azük aser

India team jenjang kanga junga toktsü.

Kasa mapang nung India nungersa Ishan Kishan jenjang ana tejakdangi tua tang tanabuba jenjang nung lir. Pai World Cup nung run 317 yanglua liasü. Wicketkeeper-batter yagi pa indang career nung tang mezüngbuba rating point timtiba ngutetogo.

Rankings nung Tim Seifert jenjang pezü tejakdangi tua tang trokbuba nung lir aser England nung asayar Jacob Bethell-a 16buba tongtetogo.

Bowler tem rongnung Afghanistan nung asayar Rashid Khan-i India nung asayar Varun Chakaravathy ajateta temaba jenjangi tuogo. Pai WC nung wicket 14 agia liasü.

All-rounders' rankings nung Sikandar Raza aser India nung asayar Hardik Pandya na mezüngbuba aser tanabuba jenjang nung lir. World Cup nung kanga junga asayaba sülen tena jenjang kanga junga kümogo.

Walker international football asaya nungi anisüngzüker



Metsüremi/March 11, 2026 (Agencies): England nung defender tejen Kyle Walker, international football asaya nungi anisüngzüker.

Arishi küm 35 tain Burnley full-back yagi England team nungi asaya 96 aser tongtibang asayamung pongu nung asayaba sülen asaya nungi anentsü atema telemtetba agiogo.

Walker shiba England team nungi tatamsa 2025 küm June ita City Ground nung Senegal den asaya liasü pai ashiba agi, tia tensa ajak ajangshia asayaogo, saka tang iba kaket ya shibanger.

"Iba telemtetba atema ni temulung mepela, saka ni England team nungi kechisa ajanzüksetogo, item ajak asoshi nema danga bilemer," ta pai ashi. "Iba ya tanü tatembang ka dangi arur," ta paisa shisem.

Walker ya England team nungi mezüngbuba 2011 küm November ita Spain den asaya aser iba sülen pa team nungi teti asaya aruogo.

Taoba mapang Sheffield United, Tottenham aser Manchester City defender ya

2018 aser 2022 World Cup aser 2016, 2021 aser 2024 küm European Championships nung England team nungi asayaogo.

Pa ya Sir Gareth Southgate-i aniba England team nung tongtibang asayar ka liasü, aser pai 2021 aser 2024 küm England team European Championship final tonga asayaba nung teyari tulu agüja liasü.

Euros anaprongla nung Walker ya Uefa indang teams of the tournament nung densema liasü aser 2024 kümbo ba team vice-captain liasü.

Ajisiüaka pa tang England manager Thomas Tuchel indang team nung mezüngoksemi arudar aser World Cup atema-a shimtsü timla mali.

Walker-i ashiba agi, England team nungi aiben asayatsü maongka anguba ya pa asoshi tetushi tulu aser iba atema kanga nema adanger.

Walker asaya nungi anenba sülen pa indang position nung Chelsea nungi asayar Reece James asayatsü imlar. Pa ya England nung right-back asayartem rongnung tajungtiba ka ama asaya nungi anisüngzüker.

BILEMDANGANG

"Jenang shitak agiba ajanga na takok dangi anitsü."